

Skim harga maksimum ayam standard dilaksana jika perlu - Nanta

Bernama | Diterbitkan pada Jun 20, 2020 16:57 +08 | Durasi: 1 minit, 27 saat



Nanta membuat tinjauan di sebuah pasar di Butterworth pada Sabtu.

BUTTERWORTH: Kerajaan tidak akan teragak-agak untuk melaksanakan skim harga maksimum bagi ayam standard sekiranya masih berlaku kenaikan harga secara mendadak.

Menteri Perdagangan Dalam Negeri dan Hal Ehwal Pengguna (KPDNHEP), Datuk Alexander Nanta Linggi berkata, pihaknya akan menetapkan harga siling bagi ayam standard sama seperti yang dilaksanakan ketika musim perayaan jika ada keperluan.

"Pagi tadi saya melawat pasar berdekatan dan sempat berbual dengan peniaga ayam. Mereka akui ada kenaikan harga ayam hampir 40 peratus dan pihak kami juga ada menerima aduan daripada pengguna. Jadi, kami di kementerian khususnya pihak penguatkuasaan telah membuat pemantauan.

"Pada peringkat awal, kami memberi amaran dahulu supaya jangan jual dengan harga yang begitu tinggi. Kami dapat maklumat, mungkin pihak pemborong dan penternak yang menaikkan harga ayam ini.

"Peniaga ayam tak ada ruang untuk mendapat keuntungan pun kerana harga yang dibekalkan kepada mereka itu tinggi," katanya pada sidang media selepas mengadakan lawatan kerja ke MSM Prai Berhad, di sini pada Sabtu.

Beliau berkata, difahamkan ada peniaga yang menjual ayam pada harga antara RM10 dan RM11 sekilogram, berbanding RM7.50 ditetapkan di bawah Skim Harga Maksimum Musim Perayaan (SHMMP) Hari Raya Aidilfitri baru-baru ini.

Nanta berkata, buat masa ini pihaknya belum menetapkan harga siling bagi ayam standard memandangkan musim perayaan sudah berakhir.

Sementara itu, Nanta turut menasihatkan penternak supaya menjual ayam secara terus kepada peniaga bagi mengelak kenaikan harga ayam secara mendadak.

"Kita dapati penternak menjual ayam kepada anak-anak syarikat mereka atau pemborong dan di situ mereka menaikkan harga. Penternak boleh jual secara terus kepada peniaga kecil untuk bantu mereka, jangan semua dijual kepada pemborong," katanya.-- BERNAMA

<http://www.astroawani.com/berita-malaysia/skim-harga-maksimum-ayam-standard-dilaksana-jika-perlu-nanta-248021>